

編號 8 號

【蹶山】劉玉蕉原作

天旨光，狗旨吠，阿姆就在該咻哩！「阿榮啊，好跣哩，日頭愛出來哩啲！」

「阿珍妹，遽遽著鞋啲，愛出門哩啲！」

天甫甫仔光，日頭還在該睡目，偌兜一屋下人就目擘擘仔起腳行，共下去蹶小中崙山哩。路狹狹仔，草面頂个露水旨散，分偌兜个腳徑啊著，就歸串歸串碾落地泥，一粒一粒金皙皙像珍珠樣仔，靚到耐毋得！吾心肝肚偷偷想：若係用佢兜來串一條珍珠骹鍊，送分阿姆戴，毋知幾靚仔哦！

涼爽个風，一陣一陣吹來，路脣个花花草草，分佢吹到搖頭拗腰，領頭行禮，就像該戲臺面頂，煞猛表演个大明星共樣。行到山下，老妹湊偌拚輸贏，看麼人先跋上山嶺頂去。兩儕就恁樣頭磬磬，麼人都毋認輸，相爭拚往上。偌座大當然輸毋得，歸路毋敢停跔，嚟嚟嘍嘍大氣緊啟，直直拚上山，蹶到山頂，撇等心臟，佢斯跳到硬硬像愛恬忒樣仔哦！

「哇！山頂个風當涼呢！」看往下，老妹還在半山排，厥个面頰卵紅啾啾仔，偌看哪，廟肚个關公都無佢恁紅哦！一張嘴擘

啊擘仔，又像細狗仔啟氣，實在還古董，還好笑！

山頂个風，特別清，特別涼爽，風裡肚有東勢果子个香氣，有花花草草个清甜味緒，這風吹到人歸身仔鬆爽，吹到人透心涼，進前蹶山个艱苦，到這下也做下毋記得也！樹頂絡食个鳥仔嘍嘍啾啾¹，跳上跳下叫無停，草實个蟲仔毋願輸佢，也唧唧滾應聲。打早，山頂就恁仔鬧熱濟借哩！眺望該山下，遠遠个東勢，到今還蒙等一層紗，在濛沙煙裡肚睡到毋知好醒呢！

「遽遽，大家看！還靚哦！」

東片个雲像打咁粉樣仔，紅霞紅霞。紅霞退忒，係千條萬條个金色光，對山仔个後背射出來，無幾久，一粒大火球，就對山頭跳出來哩，晟到人擘毋開目，晟到濛紗遽遽隱身。日時頭个事頭，對這下正正式起勢呢！

企在山嶺頂，偌兜放勢牯享受打早个光景，登高眺望个開闊視野，使人心情快樂，分人知得感恩，感恩大自然賜分偌人恁仔个好環境。阿爸長透講：「早跣床个鳥仔就有蟲仔好食。」到這下，偌總算體會著這句話个意思哩！

¹ 嘍嘍啾啾：音 jì jì jiu jiu；狀聲詞。形容鳥鳴聲。